

# "Sofi" for di Hulanda ta cla pa bin establece na Aruba

Ayera por a ripara, no solamente riba caya pero tambe na radio, cuanto rabia tin na Aruba riba e instancia conoci como **"Belastingdienst"** pa no bisa **"Inspectie der Belasting"**.

Di tur departamento gubernamental of tur instancia gubernamental, mi ta kere cu e **ODIO** mas grandi na Aruba ta riba e instancia aki, y ademas di e rabia of odio aki, tambe **DESCONFIANZA**.

Esaki ta loke por tende ultimo añanan tur dia y tur caminda. Tin un desconfianza enorme den e instancia aki, y **NADA** ningun hende por haci, pasobra tin asina tanto ley cu **DEBERnan** menciona, mas diki cu cualquier Enciclopedia, cu hasta si bo studia esaki, ainda tin un enciclopedia **"scondi"** cu ta sali pa muestra cu bo ta perde toch.

Peor ainda ta cu ningun gobernante, ni ministerio publico no tin nada di bisa e instancia aki, pues gana bo no por gana **NUNCA**. (Sin embargo si ministro bisa **"kita man di Chomon Patoejs,"** e departamento ta kita man, y si ministro bisa **"bay pe!"**, e departamento ta bay pe tambe).

Pero ta ministro mes a bisa cu pa aña e seccion di cobramiento di belasting ta costa 100 milyon florin ( y esey ta pa cobra 50 milyon florin).

No ta mihor pa **"doek op"** e manera di traha di e seccion y bini cu otro forma?

Ayera ta djis splicacion di un conferencia di prensa unda a menciona asunto di number di cuenta di banco, tabata suficiente pa den comunidad rabia wordo expresa. Asina hopi nos ta **STIMA "departamento di impuesto"**.

Na Hulanda esaki ta e number social fiscal, conoci como **SOFI** number, y cu esaki bo por ser controla di tur banda.

E number **"Inocente"** aki no ta asina inocente si bay tras di un caso conoci.

Sr. Inocente a bay cerca un instancia gubernamental, un **"Fundacion"**, pa busca un fianza pa traha un cas.

E fundacion aki ( **sin SOFI** ) si a haya dato di banco (screen e cliente) y haya sa cu e tin diez pico mil ghespaar na banco.

Esaki a causa cu e no por a haya e fianza, **"pasobra e tin placa na banco"**.

Tabata trata di placa pa estudio di nan yiunan cu nan tabata spaar, pero no a puntra esaki y ora a haya sa no a acepta esey tampoco.

Pues e **"privacidad"** di number of cuenta bancario ta **"un flie cu no por subi"**.

Locual si ta un realidad ta cu bo no tin nada di bisa mas riba bo propio placa riba nos isla.

Nan tin hasta e placa scondi den freezer di bo frigidaire, controla, di tempo di **MOT** cu **LOT** cu **POT**.

## E DOLORNAN PA POR TIN POCO PLACA

Na radio por a tende ayera cu por sconde placa bao di tera den bleki.

Otro a bisa cu esey no ta bon, mihor pone e placa den un botter y e botter den bleki, pasobra bleki ta frustia.

E di tres a bisa cu no por haci esey pasobra chollernan lo cumenza cana rond drenta tur cura di cas cu **"metaldetector"**.

Otro a bisa pa sconde esaki den **"Beehaa"**, pero otro persona a bay contra, pasobra no ta bon pa ora tene cierto relacion y cu e homber por baha bay cu e placa asina cu kita **"Beehaaaa"**.

No tin cos cu por haci pa sconde mas riba e isla aki.

Si bo bay deposita 6000 florin, banco kier sa di unda bo a haya placa.

Si bo bisa cu ta di Juby, banco kier sa pakico Juby a dunabo e suma ey y relaciona cu kico el a duna bo e placa.

Banco kier sa si e placa ta **"limpi"** of si e placa ta **"sushi"**. Banco ta laga controla cerca Juby y ta tende cu Juby a haya e

placa di **"Hubert"**.

Banco kier sa con bin Hubert tin tanto placa, y asina e preguntanan ta sigui.

Si bo bay cu un check pa cobra 6000 florin, ta e mes **"examen di "unda", "kico", "con" etc"** ta bin dilanti atrobe.

Bo no por scapa, peor ainda cu e macambanan ta bin controlabo.

Atabo cu un lugar nocturno unda basta cliente ta bin dal un drink tur anochi.

E macamanan ta yega dialuna, check bo lugar bon, conta hende, calcula cuanto bo ta bende, y tende cu diaranzon y diabierna ta e mihor anochinan.

Nan ta bini diaranzon y diabierna anochi, haci nan control, y den poco tempo, ta klap bo un **"Shon Diner"** di belasting **"in naam der Koningin"**.

Na Aruba esaki por.

Na Hulanda si nan busca un set di marocano pa haci e control aki, ta den **"sloot"** ta haya e marocanonan aki na pida pida.

Aki na Aruba ta tende so mi a tende di e portuguez cu a manda macambanan te na Kooyman y Bohama y di e macamba femenino cu a haya e sistema di traha aki un **"rootsooi"** y cu nan a mande Hulanda back **"per direct"** pasobra awor si e ta **"deugt niet"**

## PLACA EFECTIVO HEREDA DI PAPA

Mi por a hereda di mi tata 5 milyon florin cu el a spaar henter su vida y nunca a hiba banco. Awor, atami cu e placa.

Si bay banco, nan kier sa di unda e placa a sali, con bin mi tata tabata tin e placa aki y con e por a yega na e suma y mil pregunta mas.

Si tur cos a sali bon, mi no ta scapa toch, pasobra mi tin cu paga **"Erffenisbelasting"** riba e 5 milyon.

Esaki ta belasting cu mi tata no a paga riba e placa y cu awor tin cu wordo paga.

Riba esey mi ta bin haya cu mi tin cu paga **"vermogensbelasting"** pasobra mi **"vermogen"** a subi cu e placa aki.

Asina nan ta keda plumami y ta hasta bisami cu ta **"Zwartgeld"**.

Mi ta dicidi anto di saca e placa di Aruba, locual tambe ta bira un kibramento di cabez.

Ta cierto montante so mi por saca y declara cu mi ta sali cune.

Pa mi bay B.V.I., Lichtenstein, Suiza of Luxemburgo, ta tur siman mi tin cu haci un viahe, y nan ta bay detenemi un dia pa esaki of ta tur siman mi tin cucambia mi destino di salida di Aruba.

Bo ta dicidi cu bo ta pone bo placa den banco na Merca.

Pa bo mala suerte, Aruba tin un tratado di impuesto cu Merca y por check tur esey. Bo no por sconde na Merca.

Bo ta dicidi e ora ey di bay pa **British Virgin Islands, (B.V.I.) of bo ta bay Lichtenstein, of Suiza of Luxemburgo.**

Bo ta pone bo placa na un banco eynan, y cu bo carchi di ATM bao di number di compania **"Oroubo Corporation NV C.A."**

bo ta saca placa rond di mundo y na Aruba, cu e carchi aki.

Na Aruba belasting por impone riba bo **TUR** obligacion y bo derechonan ta limita.

Bo por protesta contra esaki y bay corte, pero si bo no ta contento bo **NO POR** apela.

Na Hulanda si bo por apela den **"hogerberoep"** y hasta bay **Cassatie"**

Pues kico ta keda anto pa nos haci?

E manera mas safe cu bo placa ta nada otro cu **GASTA** e placa.

Juby Naar.



[www.diarioaruba.com](http://www.diarioaruba.com)

The way business moves!

**DIARIO**  
Online  
E Matutino di Aruba